

طول عمري

أعلم قلبي ازاي يصبر

وازاي يقدر

يخلي الصبر عنوانه

عشان لو ضاع

في يوم حلمه

يعيش بالصبر أيامه

كتير بضيع أحلامنا

ما بين غربه

وفراق أو غدر

فعلته

ازاي يصبر وازاي يقدر

يملى كل أركانه بملح الصبر
ويحلم تاني حلم جديد
تكون فيه ليلة قدر
تحقق كل أحلامه
وبلاش م اليأس
وبلاش م الحزن لو تقدر
أدام علمته
يدوق الصبر راح يصبر
فلما جيت أدوق الصبر
لقيت روعي بتقطع
نسيت في الزحمة عنوانه
لقيتني بموت ميت موته
في كام لحظه
مشهد صعب يتكرر

ونسيت كل اللي تعلمته
ونسيت في لحظة طعم الصبر
وأنا اللي طول عمري
أقول الصبر عنواني
وكان الصبر بيهواني
وأحفظ نفسي ازاي أصبر
فمعرفةش ومقدرتش
ازاي في غيابك
أكذب روعي وأقول أصبر
لاني أكيد هكون بكذب
ومش هقدر
وازاي اصبر وازاي أنساك
وتبقى بعيد عن عيني
يغور الصبر

ويغور كل اللي تعلمته
سامحني مش هقدر
أقول أنساك
يغور الصبر مش هقدر